

# المظاهرة

# سعيد حجاج

## شخصيات المسرحية

1. أمينة : خادمة في أوائل الأربعينات . ترتدي ملابس متنافرة فوقها بالطو من الصوف .
2. خميس : متشرد في السابعة والعشرين . خفيف الظل وذو صوت جميل .
3. إبراهيم : مهندس زراعي في منتصف الثلاثينات . مثقف , دائم التوتر والعصبية .
4. د/ خليل : عالم اجتماع في أواخر العقد الخامس .
5. الضابط .
6. وكيل النيابة .
7. عميد شرطه .

8. قاض .

9. شاهين : شرطي أمن مركزي مدجج بالأسلحة .

10. خليفة : شرطي امن مركزي مدجج بالأسلحة ويرتدى قناعا واقيا .

11. مسئول كبير .

صحفيون , متظاهرون , مصورون , أصوات من الخارج .

## استهلال

( المسرح مظلم تماما , فقط ثلاث بقع ضوئية تسقط فوق جثث أبطال مسرحيتنا وهم غارقون في دماءهم , جنود مدججون بالسلاح يلفون المكان . مصوبة أسلحتهم نحو الجمهور وفى انتظار أي تحرك نحو الجثث . يظهرون في هامش الإضاءة كأشباح , بعد لحظات يدخل الصحفيون والمصورون ليغطوا الحدث . يسيطر على هذا كله جو من الصخب والموسيقى الجنائزية التي تعلو رويدا رويدا حتى تسيطر على المشهد المسرحى . خفوت تدريجى حتى  
( الاظلام )

### المشهد الأول

( حين تسطع الاضاءة على المسرح نجده متعدد المستويات المتداخلة , يتوسط هذا كله مساحة مضاءة بتركيز شديد . وهى عبارة عن جزء من استديو تصوير برامج تليفزيونية ولايحوى سوى مقعدين واجهزة تصوير . وهذا المكان يوجد فى منتصه المسرح فى المستوى السفلى . المستويات المرتفعة والمتداخلة فى المسرح هى عبارة عن اماكن اخرى للأحداث عليها بعض الموتيفات التنتعبر عن المكان والمشهد )

. اصوات صخب متداخل لاتبين ملامحه .

. ثم اصوات متداخلة مع انفجارات وخطوات تتباعد راكضة وصراخ يتلاشى مع اصوات ارتطام .  
. تدخل الشخصيات الثلاثة التى رأيناها كجثث فى الاستهلال وهى مندفعة بنفس ملابسهم .  
لكنها خاليه من الدماء .

. ابراهيم يترنح ويتنفس بصعوبة ويسعل باستمرار ثم يسقط فى ركن اما جوار حقيبة سفر  
ضخمة تخصه .

. امينه تدخل وهى تغطى عينيها بمنديل بيدها وباليه الاخرى تتحسس الطريق امامها .  
. خميس يندفع نحو باب جهة اليمين . نراه مندفعاً يحاول فتح الباب وينظر للداخل . يدخل  
ليخرج بعد برهة مغسول الوجه وهو يجفف وجهه بملابسه .

خميس : المكان ده امان .. تعالى بسرعة .

امينه : فين ؟

خميس : هنا .. يمينك .. ايوة . ايوة .

( يعود ليسحبها من يدها نحو الباب بخشونة )

خميس : الدنيا مليانه خلق برة وممكن يوصلوا لنا .ز المكان ده امان .

امينه : حاسب هاتخلع دراعى الله يخرب بيتك يابعيد " تلقى نظرة للداخل " لأ .ز انت هاتدخلنى فين

؟ انت فاكرنى ايه يا جدع انت ؟ لأ ده أنا أصوت وألم خلق الله هنا " تصرخ "

خميس : " يسد فمها " اسكتي .. انتشى هاودينا في داهيه .

امينه : انت فاكرنى ايه ياواد انت ؟ أنا أد امك .. عيب اختشى .

خميس : فيه ميه جوا علشان تغسل عينيكي . ولا بتمثلنى ؟

امينه : حد يمثل العمى يا ابو مخ تخين ؟ .. وبعدين أنا مستريحة هنا .. لا داخله ولا خارجه .. انت شبطه ليه ؟

خميس : انتشى فاكرانى هها اعملك ايه جوا ؟

امينه : تلاقيك قلت فى الزحمة ياما احلى اللحمة .. انما اسمع .. انا مش من البنات اللى انت بالك فيهم .. ده انا آكلك بسنانى .

خميس : هى فين الزحمة دى ؟ الزحمة برة يامدام .

امينه : برة ولا جوة ؟ هى بتفرق معاكم ؟ " فجأة " يانها راسود . عينى هاتولع الله يبتليهم بنايية .  
تقولش كانوا بيرشوا شطة ؟

خميس : قلت لك اغسلى عينيكى .

امينه : سيبك من حكاية الغسيل بقى . دلوقتى هاتهدى . اسمع . انا لمحت واحد ورا وراوا حنا داخلين .

خميس : ورا فين ؟

امينه : وراك يا اعمى .

خميس : انا اللى اعمى برضة ؟ انا افكرت وراكى انت .

( يبحث خلفه فيجد ابراهيم فى حالة اعياء )

خميس : تعالى قوم معايا .. الاودة فيها ميه .. تعالى اتمضمض واغسل وشك علشان تفوق شويه .

امينه : تانى هاتقوله الاودة ؟ انت ايه حكايتك يا جدد انت ؟ انت مش فارقة معاك خالص كده ؟

خميس : وربنا ما قصدى حاجة وحشة .

امينه : طب انسى حكاية الاوده بقى واهمد .. " لابراهيم " قوم اتعدل كدة . ورينى احسن تكون اتعورت ولا حاجة .

ابراهيم : لا لا انا دلوقتى هارتاح .

( سيل مفاجيء من اصوات الرصاص يتبعه صراخ . يتجمع الثلاثة فى كتلة تشكيلييه وعلى وجوههم الفزع. تخفت الاضاء ليظلوا كأشباح طيلة المشهد وبعدها نرى الضابط امام وكيل النيابة والسكرتير يدون اقوال الضابط وذلك فاحد المستويات العلوية )

الوكيل : اتفضل .

الضابط : الاول . ابراهيم الاطفيحي . عازب .. لسه راجع من السفر من احدى الدول العربية الشقيقة .

الوكيل : من فضلك لخص .. السن ؟

الضابط : 35 سنه .

الوكيل : كنت تعرف القتل قبل الحادث؟

الضابط : لأ .

الوكيل : لما شفت الجثة اول مرة كان جنبها سلاح ؟

الضابط : ماكنتش اول واحد يشوف الجثة سيادتك .

الوكيل : جاوب على أد السؤال .

الضابط : ماشوفتش سلاح .

الوكيل : التانى ؟



- الضابط : امينه مغاوري النمر مغاوري .
- الوكيل : المهنة ؟
- الضابط : واضح من هدمها انها كانت شغاله .
- الوكيل : ايوه .. شغاله ايه ؟
- الضابط : شغاله شغاله سعادتك .
- الوكيل : سنها ؟
- الضابط : 43 سنه .
- الوكيل : هل كانت القتيله معروفة لك شخصيا ؟
- الضابط : لا .
- الوكيل : لما شفت الجثة كان فيه جنبها سلاح ؟
- الضابط : ماكنتش اول واحد وصل لمكان الحادث .
- الوكيل : انا عارف ده كويس .
- الضابط : ماشوفتش اسلحة .
- الوكيل : غيره .
- الضابط : خميس امبابي خميس امبابي .
- الوكيل : سمعت .
- الضابط : ده اسمه الرباعي سيادتك .
- الوكيل : السن ؟
- الضابط : 27 سنه .

- الوكيل : هل كان القتل معروف لك شخصيا ؟
- الضابط : ايوه .
- الوكيل : كأرهابي .
- الضابط : ظبطنا ه فى اكر من قضية خطف واتحاكم .
- الوكيل : خطف انا ؟
- الضابط : خطف عيش وطعميه وماشابه يعنى . مجرد جنج سيادتك .
- الوكيل : كان معاه سلاح ؟
- الضابط : ايوه .
- الوكيل : ايه نوع السلاح ؟
- الضابط : قصفة ضوافر كبيرة سعادتك .
- ( تخفت الاضاعة سريعا وفى نفس الوقت تسطع على الشخصيات )
- امينه : هاه .. بقيت كويس دلوقتى يا ....
- ابراهيم : اسمى ابراهيم .. ابراهيم الاطفيحي .
- خميس : " بسخريه " البطيخي ؟ منين عيلة البطيخي دى ؟
- ابراهيم : " بحدة " احترم نفسك .
- خميس : " مأخوذا " ايه ؟ انا باهزر معاك وربنا .. انت ماتعرفقش الهزار ولا ايه ؟
- امينه : عاشت الاسامى ياسى ابراهيم .. الاخ مايقصدش يزعلك .
- ابراهيم : يقصد ولا مايقصدش .. انا ماعرفش ايه الى جانبى هنا مع الاشكال دى .
- خميس : مالها الاشكال دى بقى يامحترم ؟ انا بنى ادم زى زيك .

- ابراهيم : انت ؟
- خميس : ايوه انا .. انت شايف غير كدة ؟
- امينه : يا جماعة اهدوا .. انتوا هاتتخافوا ولا ايه ؟
- خميس : انت شايف نفسك على ايه يا اخ ؟ انا الحق راكبنى من ساسى لراسى .. انا كنت سيبتك روحك تطلع وما عبرتكش .. لكن انا ابن بلد وما احبش اشوف حد فى زنقة وما اغيتوش .
- وبعدين لو مش عاجبك اشكالنا يا اخى اخرج اقعد برة وخذ معاك شنطتك دى .. احسن يكون فيها سلاح ولا حاجة تودينا فى داهية .. والله العظيم انت شكك راجع من افغانستان .
- امينه : " تضحك " انت شايلها ليه الشنطة دى كلها ؟
- ابراهيم : جاى من المطار حالا وما استريحتش .
- امينه : دلوقت تستريح .. اتاريك علشان كده بتتنرفز على الرجل .. ده عيل ماتاخدش فى بالك .
- ابراهيم : انا اول مادخلت وشفته والناس مش مستريح لخلقته .. ما عرفش ليه اول مشفته قلبى انتقبض .. ده شكله ارهابى .
- خميس : ارهابى ؟ .. انت اللى افكرت نفسك سايح . ايه ؟ فاكرنى ها اعلق الشنطة منك ؟ دى ماتساويش تلاته جنيه . دى قديمه . استريح .. استريح العساكر يظهر حدفوه بقنبله جت فى عقله .

### ( تسود لحظة صمت طويلة )

- امينه : فى المظاهرة اللى كانوا عاملينها الطلبة زمان .. واحد اتعور من قنبلة جت فى راسه فلقتها نصين .. الدم قعد خر جامد قوى . امبارح بقى شفته على محطة الاتوبيس لسه .. تلاقيه خد على كده .. ولو شال الرابطه شكله هايغير .

- ابراهيم : " يتأوه "
- امينه : الجدع تعبان قوى .. العساكر دول مايصدقوا يلاقوا مصيبه يشبعوا فيها ضرب.. انا خايفة  
الجدع يموت .
- خميس ك هاتزعلى عليه ؟
- امينه : الله .. مش عشرة عشر دقائق ؟
- ابراهيم : " يتقيأ "
- امينه : كلت ايه يا ضنايا ؟
- ابراهيم : انتا هالموت .
- امينه : لأ والنبي الا سيرة الموت دى .. احنا مش ناقصين .. موت فى حضن اهلك يا حبيبي احنا  
مش ناقصين .. انت كنت ماسك فى خناقهم ولا ايه ؟
- ابراهيم : القنبله فرقعت تحت رجلى بالظبط
- خميس : كنت ارمى عليها البطانية وهى تتطفى .
- اراهيم : باقولك اسكت .
- امينه : بطانية ايه بس ؟ انت فاكرها فرقعت فى بيتكم ؟
- ابراهيم : " خدونا على سهوة الاوغاد .
- خميس : انا ما عرفش ايه الى حصل علشان يعملوا كل ده . ايه الى خلاهم يعملوا العمائل  
السودا دى .. حد داس للحكومہ على طرف ؟

- ابراهيم : المظاهرات حق طبيعى لناس هاتنفصل من شغلها وتتباع للشوارع والارصفة .. لازم يعلنوا  
عن غضبهم وسخطهم لغاية مايرجع الحق والا يشوفو ا لهم تعويض يرضيهم .خميس :
- انت مالك ومال الكلام الكبير ده ؟ انت باين عليك هاتودينا فى ابو نكله .
- امينه : انت كنت شغال معاهم فى المصنع ده ؟
- خميس : يعنى رايح يتظاهر مع العمال ومعاه الشنطة دى كلها ؟ وبعدين بيقولك جاى من المطار ..
- صح يااستاذ ابراهيم ؟
- امينه : فيها ايه الشنطة دى كلها ؟
- خميس : تلاقى فيها منشورات زى بتوع السима .
- ابراهيم : كنت راجع من المطار .. سواق التاكسى مارضيش يكمل المشوار لما لقي الطريق مسدود ..
- خاف العربيه تتكسر .
- خميس : تلاقىه شاربيها بالقسط .. ماهو دلوقت ماحدش يعرف يشتري عربيه ويدفع تمنها على طول
- .. الا اذا كان حرامى ولا مؤلف تمثيلات .
- امينه : المظاهرات ممنوعة فى البلد اصلا .. الحاجات دى بتوجع راس الحكومة يابنى .
- ابراهيم : المظاهرات اسلوب حضارى للتعبير عن الرأى .. الناس كانت ماشيه اخر احترام عاوزين
- يوصلوا صوتهم للمسئولين .. لاولى الامر .
- خميس : ياعم قول الامر لله .. " لامينه " انما انت ايه اللى مشاك فى الزحمة ياطعم ؟
- امينه : كنت رايحة الشغل .
- خميس : الشغل ؟ دنيا حظوظ . ماتديش المحتاج .
- امينه : ماتقرش ياخويا وانزل معايا من بكرة .

- خميس : وشغاله فى انهى مصلحة بقى ؟.
- امينه : مصلحة ايه اللى يشغلونى فيها دى ؟ مصلحة الارصاد الجوية .. حلوة الارصاد الجوية دى ؟
- خميس : الارصاد الجوية حته واحدة ؟
- امينه : آه .. وانا طالعة انشر الغسيل ع السطوح باشوف لهم الجو وانزل اديهم تلفون .. ماتيجى تاخذ لك فمين غسيل معايا " صمت " هى دى شغلانه حد ينق عليها بذمتك "
- ابراهيم : اهى شغلانه شريفة والسلام .. انا اللى مش عارف مصيرى ايه بعد ما طردونى ونهبوا حقوقى .. الحكومات تخبط فى بعض واحنا ننهرس تحت الرجلين وندفع التمن
- امينه : اشتغل فى البلد هنا وخلص .
- ابراهيم : وانا لو كنت لقيت حاجة هنا .. ايه اللى كان يغربنى هناك ؟ انا من اكر من عشر سنين لما اتخرجت مهندس زراعى . قالوا فيه ارض بتتملك للشباب . حفيت ودخت السبع دوخات ورحت الصحرا ولفيت .. لاحياة لمن تنادى .. فى الاخر سافرت اشتغلت عامل زراعى لانى ماكانش معايا ارش .
- امينه : ترش الارض ؟
- خميس : يرش مكاتب الموظفين .
- امينه : هایشغلوه ساعى يعنى ؟
- خميس : نقطينا بسكاتك بقى .. انا سامع صوت برة .
- ( الجميع فى حالة انصات للخارج . يتوقف الكادر وتخفت الاضاءة بينما يسقط الضوء على الدكتور خليل فى احد المستويات العليا )

د/ خليل

: لاسباب دينيه وجغرافية وتاريخيه .. اصبحت الوسطيه فى التفكير وفى التصرف خاصة تكاد  
تاكون عامة بالنسبة للأسرة المصريه . يعبر عنها بالاعتدال فى القول وفى العمل منعاً لإيذاء  
الغير .. مع الاعتراف بوجود من يخرج عن هذه القاعدة يمينا او يسارا , اذ لايمكن تعميم  
الظاهرة . غير أن قاعدة الوسطية هذه اخذت تترنح عندما اكتشف اصحابها ان معيار  
الاعتدال لم يعد هو الطريق الى تحقيق الطموح او توفير الحد الأدنى من مستوى المعيشة  
اللائق ومن ثم لم يعد هناك مايجبر على الالتزام بما التزم به الاولون .وانفتح الباب واسعا  
امام التطرف يمينا ويسارا بحثا عن الخلاص من وضع بائس . وفى هذا الخصوص اكتسب  
اليمن عددا اكبر من اليسار نظرا للعب دعائه على وتر المعتقد الدينى . ومن ثم برزت ظاهرة  
الارهاب وانتشرت فى اوساط شبابيه معينه . والحق ان هناك عدة اسباب مركبة ومتراصة  
ومتداخلة تكمن وراء ظاهرة انهيار قاعدة الوسطية وانتصار التطرف , ولايمكن عزل احدها  
عن الاخرى اصاب فى مجملها الشباب فى مقتل . واصبح الجيل الحالى منه جيل الاحلام  
المرجأة لأجل غير مسمى .. ان لم تكن الاحلام المفقودة .

( اظلام . بينما نرى خميس حين تسطع الاضاءة على الشخصيات الثلاث وهو

يسار المكان ويفحصه بدقة )

خميس : " فجأة " يانهار اسود .. يانهار اسود .

امينه : ايه ؟ حصل ايه ؟

خميس : انتوا عارفين احنا فين دلوقت ؟

امينه : ماخطرتش على بالى الحكاياه دى ايدا .يعنى هانكون فين ؟

خميس : احنا فى تالتليفزيون يارجاله .

امينه : تليفزيون ؟ يعنى الراجل شايفنى دلوقت وهو قاعد فى البيت ؟ ياخرابى ده انا لما اروح هاسود عيشتى .. ازاي اقعد مع اتنين رجاله فى مكان مقفول من غير محرم .. يانهار اسود .. يانهار اسود . " تحاول الخروج "

خميس : هما فين الرجاله دول ياوليه .. اهمدى هنا . انت رايحة فين ؟

امينه : لأ .. انا مروحة .

ابراهيم : استنى .. انت رايحة فين ؟

خميس : العساكر لسه بتمشى الناس .. لو خرجنا هايمسكونا .. ويمكن يودونا القسم كمان .

امينه : عساكر ؟ يالهوتى ياخرابى .. يالهوتى ياخرابى .

ابراهيم : دلوقت الجو هايهدى وكل واحد هايروح لحاله .

امينه : بحق ياسى ابراهيم .. الله يظمنك ياخويا .

خميس : امال هانبات هنا ولا ايه ؟ " يقترب من ابراهيم " انا ما قصدتش اضايك يا باش مهندس ..

وآدى راسك ابوسها . انا قلت يعنى مش معقول نزعل مع بعض واحنا فى زنقه زى دى ,

صافى يالبن .. اهو الواحد ممكن مايشوفش التانى خالص يقوم يزعل منه .. ماشى ياهندسه

؟

ابراهيم : " ينظر له فى صمت ويبتسم "

امينه : خلاص بقى ياسى ابراهيم ,, الراجل باس على راسك خلاص " لخميس " الا انت ماقلتليش

على اسمك ليه يا اسمك ايه ؟

خميس : كنت مشغول شويه .

امينه : لأ بجد .



خميس : اسمى خميس .

امينه : انا برضه ابن اختى زيك كده .

خميس : اسمه خميس برضه ؟

امينه : لأ .. التانى اصغر منك بيوم واسمه جمعة لا .. شيطان زيك كده لكن قلبه طيب .. بس دلوقتي مات .

خميس : البقيه فى حياتك .

امينه : ماكانش ابن اختى لازم .. كان ابن جوزها .

( يستغرقون فى الضحك ثم بعدها يتفرقون وتسقط على خميس بقعة ضوء بعد جملة اللهم اجعله خير)

امينه : انا بقى اسمى امينه .. ساكنه قريب هنا فى بولاق ابو العلا .. فى بيت كحيان عند على غفير بتاع الزبادى الممششه . ايوه والله .. بس هما قالوا هايجددوا المنطقة ويخلوها فشر الزمالك .. لأ نقعد فيها ده ايه . هما هايخدونا فلوس نسكن لابيها فى شقق جديدة .. انا مااعرفش هنلاقى شقق على اد فلوس الحكومة ولا لأ . انا باقول لو الحكومة تطلع جدعة وتدينا هى شقق وتوفر فلوسها على نفسها تتبغدد بيها يبقى احسن .. بس اللى حازز فى نفسى قوى اننا نسيب الحته اللى اتولدنا فيها وعشنا فيها .. بس مش مهم اهى حته والسلام والبلد كلها واحدة . عارفين انا نفسى فى ايه .؟ نفسى يدونا شقة فى تانى دور وبتدخلها الشمس طول النهار .. جوزى راقد تعبان بقاله اكر من خمس سنين .. عنده روماتيزم فى رجليه وايديه والدكتور واصف له الشمس .. ده غير المجارى الطافحة طول الشهر والميه اللى كلها وساخة وماقدرش نشرب غيرها .. غير كده وكده العيال نفسها بتجيب مشاكل من

اللعب فى الحارة .. ولما كمان بيعدوا الناحية الثانية تلاقى البهوات جايين ياخدوا العيال  
علشان يودوهم القسم .. ماهى العيال ساعات بتشرخ وتروح تلعب فى الزمالك وتبص على  
الحريم هناك .. انا نفسى اسكن فى شارع واسع قوى .. العيال مابتجيبش مشاكل لأهلها وهى  
بتلعب فى الشوارع الواسعة .. مش كده ياخميمس ؟

خميس : تعرف ياسى ابراهيم .. انا عمرى ماكان لى اصحاب لعب معاهم ولا حبيت زى الناس ولا بت  
حبتنى .. مع انى حرامى كبير .. آه وربنا زى مابأقولك كده .. تايه مش مصدق ؟ وآدى  
البطاقة اهى .. لأهى مش مكتوب فيها حرامى .. دوخت على ماطلعتها .. هما يعرفونى كده  
من سحتنى . انا اصلا شغال تباع على عربيه نقل راكبها سواق فقرى . كل يوم والتانى تعطل  
ويروح يصلحه ومايدنيش فلوس شقايا .. يقولى صلحت بالفلوس العربيه علشان نعرف نشتغل  
عليها . ز. ويوم فيه شغل وعشرة مافيش .. كنت اعمل ايه انا بقى ؟كنت انزل سوق الخضار  
احمل صناديق التفاح .. احملها بس .. لا فكركوها يعنى اكون باكل منه ومتنغغ فى التفاح .  
ساعات بقى السوق يبقى نايم انام جنبه . ز. بس لعلمك بقى انا عمرى ماسرقت غير اللى  
يدارى جوع بطنى .. ابقى حرامى برضه ياسى ابراهيم وممكن ربنا يبهدلنى تانى ويودينى النار  
.. تفكر ياسى ابراهيم .. ربنا يخلصه الكلام ده ؟

( لايلقى جوابا من أحد فيغنى مع نفسه )

زمن البراءة اما اتولد

كان اخر العنقود

فما تطلقوش حلمى الاخير

من قمقمه

وتحكولوش حواديت

من قلب نومته تقلقله

خليه سجين حد الخيال

ماتعدوهوش

ماتوروهوش وش البشر

احسن يتوه وسط الزحام .

ابراهيم

: لساك بتحلم ياابراهيم بالوطن ؟ يااااه نفسك طويل قوى .. خمسه وتلاتين سنه ولسه

باحلم بتالوطن ياعزيز .. الوطن فى الدم ومافيش مفر .. عفاف بقى لها دلوقتى اكتر من

عشر سنين ..بتحبني . مستخسر ليه احب الوطن عدد سنين عمرى ووقت مااقرب الايكي

وتلاقيني يا عفاف ادينا بنتوه من بعض فى الزحمة .. بعد الغربه الى كلت من القلب راقات ..

الغربه السجن الى مالوش قضبان .. السج البرح الواسع .. الطابق على قلبى كأنه مغارة ..

فكرك فرحة لقانا هاتموت بعد الرجوع يا عفاف ؟

امينه

: " فجأة تكسر حالة الشجن " الساعة تجيلها كام دلوقتى ؟ هه .. حد يرد على يقولى الساعه

كام .

ابراهيم

: " ينظر فى معصمه فلايجد الساعة "

امينه

: حتى انت ياافندى يامتعلم ممعاكش ساعة .. متعلم ومتنور وجاى من بلاد بره وممعاكش

ساعة ؟كانت الغربه ليه بقى ؟

ابراهيم

: الظاهر وقعت راخرة فى الزحمة .

- خميس : ايه ياباش مهندس ؟ بتبص لى ليه ؟ انا ماليش فى الساعات والكلام الفاضى ده .. انا اسرق علشان آكل بس . انا اكبر حاجة سرقتها فى حياتى معزة .. شربت لبنها ورجعتها تانى .
- امينه : الليل ليل .. انا اتأخرت على العيال قوى .. لأ الراجل مايعرفش انى هاتأخر .. مافيش شباك هنا .؟
- خميس : الدنيا كلها شبابيك .. بس الله اعلم لو الواحد بص ممكن يشوف ايه دلوقت ؟ بس بعد شويه المسائل هاتهدى وكل حى يروح لحاله .. وبعدين بصراحة انا مش شاغلنى الموضوع ده .. حتى لوخرجت هاروح فين ؟
- امينه : انت مالکش حتة تنام فيها ؟
- خميس : ابدأ .
- امينه : ابقى تعالى نام تحت السرير جنب العيال لما ماتلاقيش حتة تنام فيها .. بس باقولك ايه ؟ ماتطولش .. الضيافة ثلاث ايم بس .
- ابراهيم : انا مش عارف اصطبحت بوش مين النهارده ؟ ايه اللى دخلنى هنا مالشوارع كانت واسعه قدام السواق ..
- خميس : ماهو لما العساكر جريوا ودخلوا فى قلب الزحمة علشان يضربوا المظاهرة كل واحد جرى فى اى ناحية والسلام .. وطلعنا احنا من نصيب بعض .. الدخان كان مالى الدنيا والواحد مش كاشف ابعد من خطوته .
- امينه : انا كان قصدى اخرم من الشارع اللى قدامى .. رجعت ورا تانى .
- خميس : النصيب بقى ياست امينه .

امينه : انا دخلت هنا غلط والسكه كانت سالكه قدامى ,, بص كده من الشباك شوف الجو هدى ولا  
لسه زعابيب .

( يقتربون من النماظة وتخفت عليهم الاضاءه .يظهر شرطيان ومعهما اجزة لاسلكيه كل واحد  
فى طرف من المسرح )

شاهين : ايوه ياخليفة .. انا واقف فى الناحيه دكها . حول .

خليفة : انا برضه واقف فى الناحيه دكها . حول

شاهين : الله امل انا مش كاشفك كيف .

خليفة : انا راخر مش كاشفك .. كيف ؟

شاهين : اه .. يبقى كل واحد واقف فى ناحيه غير دكها .. حول .

خليفة : صح .. ايه ؟ فيه اخبار جديدة عندك ؟

شاهين : لا حس ولا خبر .

خليفة : ولتاد المجانين الى جوا معطلين الارسال وتلاقى الناس دلوقتى قافلة التلفزيونات وحاطين  
ايدهم على خدودهم .

شاهين : وربنا المعبود تلاقىهم فاتحينها برضة بيسمعوا الوش .

خليفة : العيال الارهابيين دول دخلوا ازاي البتاع المتحصن د ه يا شاهين ؟

شاهين : العلم عند الله بس .

خليفة : يظهر الباب الورانى كان مفندق ع الآخر .

شاهين : هما يجوا كام واحد جوا ؟

- خليفة : يجيلوهم ثلاثين ولا اربعين .. بس انا حاسس ان العيال دولة مش هايجيبيوها البر ابدًا ..
- شاهين : هما فاكرين انهم هايقدروا على الحكومة ؟
- خليفة : كنا قدرنا احنا .. واحنا اكثر من البقر .
- شاهين : احفظ لسانك يا شاهين .. حول . حول
- خليفة : لا وربنا انا باتكلم جد .. وهو احنا عارفين ناخذ منهم حق ولا باطل ؟
- شاهين : غير الموضوع يا شاهين وحول .
- خليفة : انت خايف على مركزك ولا ايه ؟ شيخ غفر ياخي هاتخاف ؟
- شاهين : دلوقتي القوة تيجي تعززنا .
- شاهين : قوة اكثر من اللي شايفها عينيك .. دول لو نزلوا على فلسطين .. اليهود يجروا زى الولايا .
- خليفة : بلاش الكلام الواعر ده يا شاهين وحول .
- شاهين : احول ليه تانى بقى ؟ هو الواحد مايعرفش يفضفض عن روحه حبه .
- خليفة : الله يخرب بيت ابوك يا شاهين .. حاتودينا فى طوكر .. حول .
- شاهين : " يلقي بالجهاز ويغادر . " وربنا مانا محول ولا شغال مع الحكومة دى تانى .. حول .

(اظلام لتسقط بقعة الضوء على الدكتور خليل )

- د/ خليل : لعل تغير معايير الحراك الاجتماعى التى كانت سائده حتى منتصف السبعينات هو المسئول الى حد كبير عن مأزق الشباب .. وزمن المعايير التى كانت سائده وكان الالتزام بها يعصم من الانحراف عن حالة الوسطية .. قيام الدولة بتوظيف الافراد فى مختلف الوظائف , مما كان يحقق السلام الاجتماعى الى حد كبير , الا ان الدولة تخلت عن هذا الور وتركزت البحث

عن العمل لقواعد العرض والطلب . وهذه الالية فى مجتمع يزداد سكانيا بمعدل مهول تعتبر قاعدة فى غاية القسوة . اذ من شأنها القاء الشباب فى الطريق العام نهبا للأمراض النفسيه والاجتماعيه ايضا , وزيادة البطالة وجرائم الاعتداء على المجتمع فى حين ان الحصول على وظيفة ما بأجر محدد يمثل الحد المعقول من الامن والامان ولا يجد التطرف اليه سبيلا . لأن اولئك الدعاة يدخلون للشباب من باب تحقيق الحلم . ان تخلقى الدوله عن سياسة التوظيف يتمشى مع تخليها عن سياسة الاقتصاد المركزى لصالح الاقتصاد الحر من اجل تحسين ميزان المدفوعات . الا ان الآثار الاجتماعية لهذه السياسة تعطى الفرصة لتناملا تيار التطرف واهتزاز الانتماء للوطن والاعتداء عليه .. وامام هذا الموقف اخذ الشباب فى مجمله يبحث عن فرصة حظ تأتى من حيث لايدرى .. ومن يتابع برامج المسابقات فى التلفزيون التى تسأل اسئله بسيطه فى مقابل مكافأه ماليه بسيطه ايضا .. سوف يكتشف ان المتسابقين الذين يتهاكون على الفوز هم فى الغالب الاعم من المناطق العشوائية وقاع المجتمع .

(اظلام ثم نرى الشخصيات الثلاث وهم منزوين فى الركن)

خميس	: الزهق وحش .
امينه	: مش كده برضه ؟
خميس	: انتى عارف انتى بتفكرينى بمين يامدام ؟
امينه	: بأملك مش كده ؟
خميس	: لأ وربنا انا باتكلم جد
امينه	: بمين ؟
خميس	: بالست المذيعه بتاعة اغرب القضايا .. تحسى كده انها خريجه سجون .

- امينه : الله يسامحك .. كله من اصلك وتربيتك الحلوة .
- خميس : ماتيجى نتسلى شويه ياابراهيم .. اهى المذيعه موجود والى بيصوروا بيها موجودة .. وكافة شىء .
- ابراهيم : نتسلى ازاي يعنى ؟
- خميس : اهى تسألنا فى الفوايز والى يكسب تديله جايزة ولا حاجة حلوة .
- ابراهيم : خميس ماتخربش فى حاجة .. لازم نكون مسئولين ونحافظ على كل حاجة فى المكان .. المكان ده والى فيه امانة فى رقابينا .
- خميس : لأ ياشيخ .. كده وكده يعنى .. احنا نعرف الحاجات دى بتشتغل ازاي . ياللا يامدام .
- جاهزة ياست ؟
- امينه : مش قبل ماعرف الحاجة الحلوة اللى هاخذها الكسبان تبقى ايه ؟
- خميس : " يفكر قليلا " بوسه مثلا .
- امينه : باستك عقربه انت واهلك .
- خميس : بوسه اخويه يعنى .. على الخد مش فى البق .
- امينه : مش فى البق .. اذا كان كده ماشى ..
- خميس : جاهزة يامدام .
- امينه : جاهزة ياخويا . خش .
- خميس : اتفضلى .
- امينه : " تضبط هندامها ثم تقترب من ابراهيم الذى يستخف بالموضوع ثم يندمج دفعا للملل " سا الخير ياباشا .. احنا النهاردة بالصلا على الحبيب النبى عليه الصلاة والسلام



عندنا فوازير خفيفة وحلوة وتشرح القلب . ز واللى يجاوب عليها ليه عندى حاجة حلوة ..

ممکن نتعرف عليك ؟

ابراهيم : مانتى عارفة .

خميس : ياستاذ ماتبوظش الشغل احنا بنصور .

امينه : ممکن نتعرف عليك ؟

ابراهيم : ابراهيم الاطفيحي .

امينه : قولى يا اخ بطيخى .. البيضة الاول ولا الفرخة ؟

خميس : اقول انا ؟ اقول انا .

امينه : انا باقول يابطيخى .. انت اسمك بطيخى ؟

خميس : لأ اسمى خميس وانتى ؟

امينه : وانت ؟

خميس : عاشت الاسامى ياست امينه .. اقول انا بقى ؟

امينه : وربنا ماحد قايل غير سى ابراهيم .

خميس : قول ياسى ابراهيم .. يابختك ياعم .

ابراهيم : البيضة الاول .

خميس : لأ الفرخة الاول .

امينه : لأ البيضة الاول .. خد جايزتك ياسى ابراهيم .

خميس : " يشدها بعيدا . " لأ الفرخة الول .. انا اللى اخذ الجائزة .

امينه : وتاخدها ليه انت يادلعدى .. انت هاتصور وتبوس كمان والشعب يتفرج ؟

- خميس : هو قال غلط .
- امينه : غلط ليه بقى ؟
- ميس : لما سيدنا نوح عليه الصلاة والسلام عمل السفينه ساعة الطوفان وخذ معاه من كل حاجة جوز .. طلع على تالسفينه جوز فراخ ولا بيضتين ؟ طلع جوز الفراخ لأن البيض مابيعرفش يمشى . صح ولا مش صح ؟
- امينه : آه صح .
- خميس : يبقى مين اللى ياخذ الجائزة ؟ انا ولا هو ؟ " يعدو خلفها بينما تقذف بالمايك بعيدا وتعدو " وربنا مانا لاعبه هنا تانى .
- ( يستغرقون فى الضحك وفى اثناء ذلك تسطع الاضاءة على احد المستويات لنجد المسئول وحوله مجموعة من المراسلين والمصورين )
- المسئول : فى حوالى الثانيه عشرة ظهرا احتلت مجموعة من الارهابيين مبنى التليفزيون الحبيب . لكن المعلومات تؤكد انهم لم يستطيعوا الوصول لحجرة الإرسال لاننا افشلنا الخطة وتم القبض على مجموعة اخرى من الارهابيين خارج المبنى . كانوا ينتظرون اشارة البدء فى اعلان الاستيلاء على الحكم .ز كما تم التعامل مع الإرهابيين الذين كانوا يقبعون بالداخل وبحوزتهم عدد هائل من المنشورات والمتفجرات والملابس الداخليه والخارجية وجهاز فيديو حديث .. عدد المتورطين من 30 الى 40 ارهابى ونحمد الله انه لم تحدث اى اصابه البته بين المدنيين الغزل او بين شهداء الشرطة .. المنطقه هاديه وقوات الامن زى مانتوا شايفين السود بتحمى الحكومة .
- صحفى : اى جزء من المبنى تم احتلاله ؟

- المسئول : اوده واستديو وعفشة ميه .
- صحفى : هل صحيح انه كانت نساء بالداخل ؟
- المسئول : معلوماتنا ان فيه نسوان متورطة فى الموضوع .
- صحفى : كانت مهمتهم ايه بالظبط سيادتك ؟
- المسئول : فى الحقيقة ماقدرش اقول علشان الرقابه . وكمان علشان المسرحية تفضل معروضة .
- صحفى : هل كانت النساء مسلحة ؟
- المسئول : طبعا .. تسليح على درجة عاليه 100 جزمة وشبشب زنوبه و3 بصباغ .
- صحفى : اى نوع من القوات اعددتم لمقاومتهم ؟
- المسئول : ماغنديش اوامر بالاجابه على السؤال ده .
- صحفى : علشان الرقابه برضه ؟
- المسئول : علشان شكك مش عاجبنى ياروح امك .
- صحفى : هل كنتم على اتصال بهم وهم يحتلون المبنى ؟
- المسئول : طبعا .. قلنا لهم قد ازعر من افزر .
- صحفى : لماذا لم يكن المبنى مؤمنا ضد الاعتداء .
- المسئول : لاتعليق .
- صحفى : من المسئول عن هذا الخلل؟
- المسئول : لا تعليق .
- صحفى : هل تتوقعون ردود فعل من الارهابيين ؟
- المسئول : لا تعليق .

( يخرج مسرعا وخلفه الجميع لتنسحب الاضاءة على الثلاثة )

خميس : وكان فيها ايه لما يسيبوا الناس تتكلم ؟ مالناس طول عمرها بتتكلم وما بيحصلش حاجة ..

وهو يعنى كان الكلام عليه جمرك ؟

ابراهيم : ماكانش لازم يعملوا اللى عملوه ده ابدأ . كان فيها لما يوقفوا يحموا المظاهرة لغاية ماالراجل

يقول الكلمتين بتوعه ويخلص الخطبة ويوصل صوته للمسئولين .. والناس ترجع بيوتها وهى

حاسة انها عملت عمل فعال وعبرت عن نفسها , لكان هايبقى فيه مشاكل ولا يحزنون ..

خلوا الناس تجرى فى الشوارع زى المجانين وادوا الفرصة للمخربين واللصوص ينحشروا وسط

المظاهرة ويعملوا ما بدالهم .. وباظت كل حاجة .. جماعات الضغط والمظاهرات فى الدول

المتحضرة ليها دور مهم فى سياسة البلد .. ناس حاسه ان البلد بلدهم بجد ولازم تحميها ..

هنا فوضى ليه وهنا منبت الحضارة ؟

امينه : بس انا ماكسرتش حاجة ولا سرقت ياسى ابراهيم .

ابراهيم : انا قلت لعفاف قبل كدة .. لازم كل واحد يعبر عن نفسه وياخد فرصته كامله والا هاينقلب

لوحش يدمر كل شىء . لازم نعبر عن نفسنا لأننا لازم نعيشه حياه كريمه .

امينه : عفاف مين ياسى ابراهيم ؟

ابراهيم : خطيبتى .

خميس : انت خاطب كمان ؟ اتفضللى ياستى . تلاقيه كمان بيمسك ايديها جامد وهو ماشى معاها

.بتمسك ايديها جامد وانت ماشى معاها بالنهار يااستاذ ابراهيم ؟

ابراهيم : حق من حقوقنا اننا نتجوز ونعيش ياخميس .

- خميس : وربنا انا عمرى مافكرت فى الموضوع ده قبل كده .. انا اصلا نسيته .. حته اذا حصل واتجوزت , فكرك ها اعرف يا امينه وانا ممعايش فلوس ؟
- امينه : مانت زى القرد اهو .. ربنا يهدى سرکم ياسى ابراهيم .. الحكايه برضه مش حكاية فلوس .. المهم الحب . صح ؟ انا برضه اتجوزت على حب .. كنا بنحب بعض قوى .
- خميس : ودلوقتى كرهتوا بعض ؟
- امينه : مابقيناش نفكر فى الموضوع من أصله .. الخلفة ولقمة العيش والامراض كلوا الحب من جدوره .. وهاتتجوز امتى يا ابراهيم ؟
- ابراهيم : الخميس الجاى ان شاء الله .
- خميس : هاتعزمنا كده نفرح معاك وناكل ونتفرج على شقتك ؟
- ابراهيم : هانقعد مع الحاج والحاجة لغاية ماندبر سكن .. على اد الفلوس اللى عملتها برة .
- امينه : خلوات الشقق دلوقتى بقت نار .
- ابراهيم : الواحد عنده امل لسه ان فيه ناس محترمين مابيستغلوش حد .
- امينه : هما فين دلوقت الناس المحترمين .. دول ابره فى كوم قش .. انت شايف الجزمه دى ؟ انا جايهاها بخمسة وعشرين جنيه اول امبارح .. لاغلبت اتحايل على البياع يسبب لى جنيه بدل ماروج كعيبى من مصر الجديدة لبولاقي .. راسه والى جزمه قديمه ان الجنيه ده هو مكسب المحل .. انا يامؤمن بادفع اجرة خمس ايام من قبضى علشان البس جزمه محترمه .. علشان باشتغل فى بيت ناس محترمين ومش عاوزاهم يستقلوا بالناس الغلابه اللى زينا .. ولا يقولو علينا كلمه مش ولا بد .

( تخفت الاضاءة لتسطع على الدكتور خليل )

د/ خليل

: ومن اللافت للنظر ان هذا المدخل الاقتصادى الاجتماعى لتفسير المأزق لا يلقى ترحيبا من الدوائر المختصة والمسئولة ويفضلون عليه مقولة ان الشباب هم ضحية المفاهيم الدينيه الخاطئة .. ومن هنا تكرر لدور قوافل التوعيه التى تجوب الافاق ويحضرها تجمعات من الشباب من غير المعنيين بالخطاب .. وتزداد مساحة البرامج الدينيه التى لايشاهدها احد من المعنيين بالخطاب .

### ( اظلام لتعود الاضاءة على الثلاثة )

خميس

: عارفين ؟ انا مرة استضافونى فى التلفزيون وانا ماشى على الكورنيش وكلمونى فى مشاكل البلد وتتحل ازاي .. ولما قلت لهم على الحل طفوا النور وحسيت ان المصوراتيه اللى معاهم سابوا كل حاجة و وقفوا يتفرجوا على ويمصصوا فى شفائيفهم من غير مايصورونى .. وفى الاخر خلونى اغنى لما قلت لهم انى باعرف اغنى ونفسى اطلع شريط.

امينه

: ياعم ماتدقش .. انا مرة شفت الست المذيعه اللى عامله نفسها بتعطف على الغلابه وتحل مشاكلهم .. حاولت اكلهما تشوف لى صرف فى علاج جوزى ومصاريف الدوا . مارضيتش ابدا .. مسكت فى شباك العربيه علشان تقف تسمعنى جرجرتنى عشرين متر زحف على الارض والعساكر كانوا عاوزين ياخدونى القسم .. علشان قال ايه باتسول ولا بابيع مناديل فى الاشارة .. قلت لهم هى فى الاشارة ؟ وهى فى المناديل ؟ واحد منهم حط لى كيس مناديل فى ايدى وجرجرنى على القسم .. يومها عرفت ان العطف على الغلابه اللى بيحوا فى التلفزيون مش اكر من برو عتب .

ابراهيم

: انت بتعرف تغنى ياخميس ؟

خميس

: امال .. ده صوتى لو نزل فى شريط يجنن نص البلد .

- امينه : طب والنص الثانى ياخميمس ؟
- خميمس : ده مجنون خلقة .
- ابراهيم : غنى ياخميمس انا عاوز اسمعك .
- خميمس : " يمسك مقشة من احد الاركان ويبدأ الغزف بها كعود "

فات زمن الحواديت والحكايات

ولا عادش الحلم المسحور

ياخدنا فى قلبه سبع لفات

فات الحلم بقاله كتير

ضى وراح فى العتمه اسير

ولسه الحزن فى قلب البير

مدد قلبه على العتبات

فات والذكرى ماهيش بتفوت

لسه آدانها بعلو الصوت

يندهنا نصحى من الموت

نلمح بكرة سكات فى سكات

فات زمن الحواديت والحكايات

ولا عادش الحلم المسحور

بياخدنا فى قلبه سبع لفات

شايف الحلم كأنه بعيد

جای وراكب فرس العيد

وهايحيكى لنا بحب شديد

حل الجاى من الازمات

( فجأة وقبل ان يفرغ من الاغنية نسمع صوت طلقات ناريه وصوت آت من

ميكرفون قوى )

- الصوت : القوات محاصرة المبنى كله .. سلموا نفسكم .
- امينه : " بفزع " شوفتوا ؟ واحنا اللى كنا فاكزينهم هايمشوا واحنا نخرج .
- ابراهيم : قوات ايه اللى محاصرة المبنى ؟
- صوت : قوات الامن والجيش محاصرة المبنى .
- خميس : " رافعا صوته فى رعب " انا مش هاأخرج ولا بالطبل البلدى .
- امينه : هما هايعملوا فينا ايه ؟ هايهدوا السقف علينا ؟
- خميس : هايضربونا بالنار طبعا .
- امينه : حق ياسى ابراهيم ؟
- ابراهيم : انا مخى اتشل .. مش قادر افهم أى حاجة .. احنا ماعملناش حاجة اصلا لا ضد البلد ولا
- ضد القانون .
- خميس : على مايصدقوا ان الجمل مش قرد تكون كل حاجة خلصت .
- امينه : يعنى ايه الكلام ده ؟
- خميس : يعنى مش هانخرج غير لما يدونا الامان .



امينه : احنا هانتشرط على الحكومة يالبنى ؟ وهما كانوا ادولنا الامان امتى علشان يدوه لنا النهاردة ؟

خميس : انا مش خايف منكم " يصعد على النافذة "

صوت : هانديكم فرصة خمس دقائق .. بعد كده هانتصرف بطريقة خاصة .

خميس : شفت ؟ بيقولوا هانتصرفوا بطريقة خاصة .. حتى الطريقة خصصوها ياعم .. البلد كلها اتخصصت ياعم .

امينه : يعنى ازاي ؟

ابراهيم : لازم نخرج طبعا .. مافيش فائدة .

خميس : استنى .. على الاقل نسيب ركبهم الاول وبعدين نخرج .

امينه : انت فاكرك الحكومة ايه ؟ عيال بتلعب معاك فى الحارة ؟

خميس : ماحدش يعرف ظلم الحكومة دى أدى .

ابراهيم : مافيش داعى للغنتريه فى موقف زى ده ياخميس .

صوت : أى مقاومة مش فى صالحكم .. ارموا السلاح اللى معاكم واخرجوا .

خميس : سلاح ؟ سلاح ايه اللى نرميه ؟ انا ممعايش غير قصافة ضوافر .

ابراهيم : واضح اننا اتورطنا .

امينه : يعنى ايه الكلام ده يااخويا ؟ يعنى مش هاخرج اشوف الراجل واكل العيلين ؟ انا جوزى

عاجز وماحدش يعرف يراعيه غيرى , والعيال هاتموت من الجوع لو انا مارجعتش .

ابراهيم : " محبطينا " احنا اتورطنا فعلا .

صوت : هانوفر لكم محاكمة عادلة لو خرجتم من غير مقاومة .

- امينه : " تنظر من النافذة " يانهار مش فايت .. الخلق برة زى النمل .
- خميس : انزلى .. انت بتعملى ايه ؟
- امينه : ده شباك سجن اللى بره مايشوفش اللى جوة ابدًا .
- خميس : " مهتاجا " هايضربو نار على الشبابيك .. الدنيا هاتولع كلها نار .
- امينه : انت ما عندكش قلب ولا عيال .. انا هاخرج يعنى هاخرج .
- خميس : لو خرجنا هانموت .. انتوا مجانين .
- امينه : انت عاوزنا نخالف الحكومة ؟ دى مايقدرش عليه غير ربنا بس .
- ابراهيم : لازم نخرج رافعين ايدينا .. الخمس دقائق فاتوا .. وماحدثش عارف هاتصرفوا ازاي اذا ماخرجناش .
- خميس : انت عاوز تخلص مننا يا جدد انت ؟ ما فيش حد هايخرج من هنا واللى عاوزين يعملوه يبقوا يعملوه ..
- ابراهيم : انت فاكّر نفسك ايه ؟ هانسلم يعنى هانسلم .. انت مالكش لا اهل ولا بيت .ولاحد تخاف عليه .
- خميس : عندك حق ياسى ابراهيم .. اخرجوا انتوا وسيبوني فى حالى .. انا ماليش حد صحيح يخاف على ولا يستنانى .. يبقى هاخرج ليه بقى ؟
- ابراهيم : لو ماخرجناش كلنا الموضوع هايكبر ويفتكروا اننا عاملين خطة ضدهم .. قوم . قوم .
- خميس : " بعنف " قلت لك مش قايم يعنى مش قايم " يتعاركان سويا " اخرج انت اذا كنت خايف يا جبان .
- ابراهيم : انا جبان يا ابن الكلب يا ضايع .
- خميس : انتوا اللى زيكم بس هما اللى جبنوا وكلا ب الحكومة .. انما انا ماليش حد .
- ابراهيم : وحياة امك اقتلك هنا لو ماخرجتش .

امينه : انتوا هاتتخانقوا وهما قاعدين برة .. هايهجموا علينا ونروح كلنا فى ستين داهيه .

ابراهيم : اسمع الكلام يا حيوان واخرج . انا خايف عليك .

خميس : : بعد لحظة صمت واستسلام " لو جرى لنا حاجة هاتبقى انت المسئول قدام الالم كله .

ابراهيم : انا المسئول عن ايه ؟ التأخير ده مستحيل يسامحونا عليه .

امينه : انا هاخرج للراجل والعيال واللى يحصل يحصل .

ابراهيم : استنى .. هانخرج كلنا .. " يسحب خميس من يده وخميس منكسر "

( ينظرون لبعضهم البعض ويتكاتفون بينما نسمع جزء جماعى اغنية خميس . فجأة ينفث عليهم الباب وينطلق وابل من الرصاص فيتساقطون الواحد تلو الآخر فى اماكنهم الاولى بينما صوت الاغنيه يتصاعد ليغضى على صوت الرصاص )

شايف الحلم كأنه بعيد

جاي وراكب فرس العيد

وهايكنى لنا بحب شديد

حل الجاي من الازمات .

## اظلام

### خاتمة

( المسرح جميعه فى اضاءة كامله يغلفها الحزن .. الجثث فى اماكنها .. الجموع تحيط بالمكان .. الجنود المدججون يتجهون بأسلحتهم نحو الجمهور .. )

د/ خليل : الخلاصه ان ثمة دوافع تدفع بعض الشباب للانحراف عن الوسطية الى طريق التطرف والاعترا ب عن المجتمع او الاعترا ب فيه .. واحسب ان الحاجة الإقتصادية وفقدان الأمان الإجماعى تأتى فى مقدمة الدوافع .. إذ لا يولد الإنسان متطرفا .. ولكن هناك دائما مايدفعه لإتخاذ التطرف سبيلا . لتحقيق ماينشده .

(يظهر القاضى فى مكان بارز ويضئ المسرح تماما .والجثث غير موجودة )

القاضى : المجتمع لازم يطمئن لعدالة القضاء . لازم يطمئن ان لا حق يضيع فى ارض علمت الحضارة للإنسانية وانارت الطريق . الدولة قادرة ان تكفل محاكمه عادله للجميع . السلطه التنفيذيه لاتستطيع ان تنفذ حكما غير متوج بتاج العدالة والذى تضعه السلطه التشريعيه .. الكل سواسيه فى دستور البلاد ولا أحد فوق القانون .. اتفضل. ( يدخل العميد قاسم السماوى )

القاضى : العميد قاسم السماوى .. انت كنت مسئول عن الامن فى اليوم ده ؟

العميد : مطبوط سيادتك .

القاضى : تقدر تدينا معلومات عن نوع القوة اللى كانت رايحة لردع الموجودين داخل المبنى ؟

العميد : اربع عربيات مدرعة وعربيتين مطافى وميه وخمسين رشاش آلى .

القاضى : والأمن المركزى وقوات مكافحة الارهاب ؟

العميد : كانوا موجودين سيادتك .

القاضى : تحت قيادتك ؟

العميد : تحت قيادتى سيادتك .

القاضى : انت مشايف ان الموضوع كده شكله استعراض مهيب للشرطة ضد 3 انفار مهما كانت درجة تسليحهم ؟

العميد : سيادتك فى الوقت ده ماكانش عندنا فكرة عن عدد الارهابيين فى المبنى . التقارير الاوليه اشارت لوجود اكثر من اربعين شخص على الاقل .

القاضى : لكن التقارير دى ماكانتش دقيقة .

العميد : احب اوضح اننا كنا فى موقع مكشوف بين الارهابيين اللى جوا المبنى وبين المناطق المأهولة بالسكان والموظفين .

القاضى : وانت شخصيا اصدرت الامر بخروجهم وتسليم نفسه بالميكروفون .

العميد : اكثر من ثلاث مرات سيادتك .

القاضى : وبعد اقل من عشر دقائق من المرة الاخيرة ظهوروا .

العميد : مضبوط سيادتك .

القاضى : اسمع ياسيادة العميد .. فيه كلام مجود فى كل التقارير اللى اتعملت عن احداث اليوم ده ..

محامى المتوفين اللى وكلته الحكومة بيقول انه لم تتم اى محاوله للقبض على هؤلاء

الاشخاص عندما ظهوروا وانما تم التعامل معاهم بشكل تأديبى لكى تلقنوا الإرهابيين درسا لا

أحد يستطيع نسيانه فى أى مكان .

العميد : ظهوروا سيادتك وهما فاتحين النار من جوا المبنى . وماكانش فيه أى امكانيه علشان نقبض

عليهم .. ساعتها فهمنا ان دى طلائع لقوة اكبر .

القاضى : سبق ان أحد رجالك ادلى بأقوال مخالفة .. حيث لم يعثر على قطعة سلاح واحدة بحوزة

القتلى .

العميد : الغوغاء والمتجمعين خارج المكان كانوا اول ناس تجرى ناحية الجثث وفيه احتمالات تكون الاسلحة اختفت بمعاونة ارابيين من الخارج .

القاضى : انت عارف ياسيادة العميد ان المحكمة لاتتعامل مع الاحتمالات ولكنها تتعامل مع القرائن والادله والبراهين .

( يختفى الصوت لتتصاعد الموسيقى والاغنيه الجماعيه .. بينما القضييه على

اشدها بين القاضى والعميد . تخفت الاضاءه بنهاية الاغنيه )

اطلع جوا الحلم ربيع قلبى جناين فجر وسيع

اطلع قبل الكون مايضيع غنى وكل الدنيا هاتسمع

اطلع كلمه ورد غطاها نتعلمها ونتهجاها

صوت الحق زمان خلاها غنوة وثورة وضحكة ومدفع

اطلع آخر ندعة نور خللى الدنيا بحالها تنور

ماتخليش للظلم جدور دى الحريه غيابها بيوجع

## اظلام

تنويه لابد منه : الاشعار للصديق الشاعر محمد حسنى توفيق من ديوان ( ليل القاهرة ) مع خالص شكرى وامتنانى .

سعيد حجاج 1998